

蔡中郎集

冊五



蔡中郎外集目

卷一

伯夷叔齊碑

司空房楨碑

荊州刺史庾侯碑

司空袁逢碑

翟先生碑

真定直父碑

桓彬論

九疑山銘

京兆尹樊德雲銘

東巡頌

南巡頌

祖德頌

陳留太守行小黃縣頌

考城縣頌

麟頌

五靈頌

卷 太尉陳公贊

蔡山 焦君贊

琴贊

樽銘
中風齋書

盤銘
天游半日書

警枕銘
天游半日書

衣箴

廣連珠

祝社文

祖餞祝文
事類

祭禊文

弔屈原文

九惟文

卷二

陳政要七事疏

曆數議

正交論

銘論

徙朔方報楊復書

徙朔方報羊月書

辭郡辟讓申屠蟠書

與袁公書

與人書

與人書

女訓

卷三

漢津賦

協和昏賦

檢逸賦

協初賦

青衣賦

警師賦

又

筆賦

琴賦

又

又

彈琴賦

彈碁賦

又

團扇賦

胡栗賦

蟬賦

荅卜元式詩

翠鳥詩

荅卜元嗣詩

卷四

獨斷

蔡中郎外集卷第一

伯夷叔齊碑

他本皆無張本有

熹平五年天下大旱禱請名山求獲荅應時處士
平陽蘇騰字玄成夢陟首陽有神馬之使在道明
覺而思之以其夢陟狀上聞天子開三府請兩使
者與郡縣戶曹掾吏登山升祠手書要曰君况我
聖主以洪澤之福天尋興雲即降甘雨因樹碑為
銘曰

惟君之質體清良兮昔佐殷姬忠孝彰兮委國捐
爵諫國亡兮譏武伐紂欲喻匡兮時不可救曆運

蒼兮追念先侯受命皇兮憂襄感兮雖歿不朽名
字芳兮

司空房楨碑

他本皆無
張本有

公言非法度不出于口行非至公不萌于心治身
則伯夷之潔也儉嗇則季文之約也盡忠則史魚
之直也剛平則山甫之勵也總茲四德式是百辟
夙夜匪懈以事一人枉絲髮樹私恩不爲也討無
禮當彊禦弗避也是以功隆名顯在世孤特不獲
愷悌寬厚之譽享年垂老至于積世門無立車堂
無宴客衣不變裁食不兼味雖易之貞厲詩之羔

羊無以加也

明明在公實惟皇后誕應正德式作漢輔邪慝是
仇直亮是與剛則不吐柔則不茹媚茲天子以靖

土宇

荊州刺史庾侯碑

他本皆無
張本有

君資天地之正氣含太極之純精明潔鮮于白珪
貞操厲乎寒松視鑒出於自然英風發乎天受事
親以孝則行侔于曾閔結交以信則契明于黃石
溫溫然弘裕虛引落落然高風起世信荆山之良
寶靈川之明珠也爰在弱冠英風固以揚于四海

矣拜為荊州刺史仗冲靜以臨民施仁義以接物

恩惠著于萬里誠信暢于殊俗由是撫亂以治綏

擾以靜帝嘉其功錫以車服方將掃除寇逆清一

宇宙廓天步之艱難寧陵夷之屯否案以下疑有闕文

司空袁逢碑他本皆無張本有

凡所臨君明而先覺疑案是句以前有闕文故能教不肅而

化成政不嚴而事治其惠和也晏晏然其博大也

洋洋焉可謂兼三才而該剛柔無射于人斯矣銘

曰此碑在公賈...

天鑒有漢賜茲世輔顯允厥德昭胤休序峨峨雍

宮禮樂備舉穆穆天子孝敬允敘降拜屏著奉饋
西序威儀聿脩化溢區宇乃尹京邑總齊禁旅

翟先生碑

他本皆無
張本有

世以仁義爲質學問爲業爰暨先生固天縱德應
運立言繼期五百實行形于州里明哲與聖合契
該通五經兼洞墳籍爲萬里之場圃九隩之林澤
挹之若江湖仰之若華岳玄玄焉測之則無源汪
汪焉酌之則不竭可謂生民之英者已國失元傅
學失表式凡百搢紳哀泣血人百其身匪云來
復于是鄉黨乃相與登山伐石而勒銘曰

邈矣先生厥德孔貞腹心弘道深高入神王錫三

命觀國之賓其視富貴忽若浮雲既不降志亦不

辱身案以下尚疑有闕文

真定直父碑他本皆無張本有案此碑文但舉一端耳疑上下尚多闕文

其接友也審辨真偽明于知人度終始而後交情

不疏而貌親

桓彬論他本皆無張本有原注彬麟之子少與蔡邕齊名仕尚書郎厲志操以忤

宦黨免官卒邕等共論序其志乃樹碑而頌焉案文似頌體移列碑類

彬有過人者四夙智早成岐嶷也學優文麗至通

也仕不苟祿絕高也辭隆從窳絜操也

九疑山碑十卷本無他本皆有張本作碑喬本及汪劉本皆作銘

巖巖九疑峻極于天觸石膚合興播連雲時風嘉

雨浸潤下民芒芒南土實賴厥勛逮于虞舜聖德

光明克諧頑傲以孝烝烝烝各本皆作蒸師錫帝應從尚書作烝

世堯乃授徵受終文祖璇璣是承泰階以平人以

有終遂葬九疑解體而升登此崔嵬託靈神僊

京兆尹樊德雲銘徐本無他本皆有案司馬彪郡國志注蔡邕作樊陵

頌云前漢戶五萬口有十七萬王莽後十不存一永初元年羌戎作虐至光和領戶

不盈四千園陵蕃衛銘當盛之作頌各本作焉民用匱乏不堪其事銘當作頌各本作銘

姑仍

於顯哲尹誕德孔彰膺帝休命謂篤不忘爰納忠
式規悟聖皇欽崇園邑大孝允光九命車服昭示
采章軒輶四牡承祀烝嘗多士時貢徭役永息道
路孔夷民清險棘同體諸舊北氓蒙福惠垂無疆
守以罔極

東巡頌注有序藝文十卷本無他本皆有張本原

刻中郎集亦載是篇姑兩存之

竊見巡狩岱宗柴望山川宗祀明堂上稽帝堯中
述世宗遵奉光武禮儀備具動自聖心是以神明
屢應休徵乃降不勝狂簡之情謹上岱宗頌一篇

曰若稽古在漢迪哲聿修厥德憲章丕烈翽六龍
較五輅齊百僚陶質素命南重以司曆厥中月之
六辰備天官之列衛盛輿服而東巡

南巡頌

他本皆無張本有原注舊集不載此篇而藝文云蔡邕作姑并存之後半

多有闕文

惟漢再受命系葉十一協景和則天經郊高宗光
六幽通神明既禘祖于西都又將禘于南庭是時
聖上運天官之法駕建日月之旃旌

祖德頌

有序無他本皆十卷本

昔文王始受命武王定禍亂至于成王太平乃洽

祥瑞畢降夫豈后德熙隆漸浸之所通也是以易
嘉積善有餘慶詩稱子孫保之非特王道然也賢
人君子修仁履德者亦其有焉昔我烈祖暨于予
考世載孝友重以明德率禮莫違是以靈祇降之
休瑞免擾馴以昭其仁木連理以象其義斯乃祖
禰之遺靈盛德之所貺也豈我童蒙孤稚所克任
哉乃爲頌曰

穆穆我祖世篤其仁其德克明惟懿惟醇宣慈惠
和無競伊人巖巖我考涖之以莊增崇丕顯克構
其堂是用祚之休徵惟光厥徵伊何於昭于今園

有甘棠別榦同心墳有擾兔宅我柏林神不可誣
僞不可加析薪之業畏不克荷矧貪靈貺以爲己
華惟予小子豈不是欲干有先功匪榮伊辱

陳留太守行小黃縣頌

他本皆無
張本有

大顛爲政建時春陽我君勤止戾茲小黃濟濟羣
吏攝齊升堂乃訓乃厲示之憲方原罪以心察獄
以情欽于刑濫惟務求輕有辜小罪放死從生立
化洽矣黔首用寧惟以作頌式昭德聲

考城縣頌

他本皆無
張本有

暖暖玄路北至考城勸茲穡民東作是營農桑之

業為國之經我君勤心德音邈成率爾苗民慎不
敬聽女執伊筐男執其耕申戒羣僚務在寬平罪
人赦宥囹圄用清

麟頌

他本皆無
張本有

皇矣大角降生靈獸視明禮脩麒麟來孚春秋既
書爾來告就庶士予鉏獲諸西狩

五靈頌

他本皆無
張本有

大梁乘精白虎用生思叡信立繞于垣垆

太尉陳公贊

他本皆無
張本有

公在百里有西產之惠賜命方伯分陝餘慶餘慶

伊何兆民其觀少者是懷老者是安綱紀文王文
王用平東督京輦京輦用清乃登三事三事攸寧
契稷之佐具干堯庭今則由古於穆誕成

華君贊

十卷本無
他本皆有

猗歟焦君常比玄墨衡門之下栖遲偃息泌之洋
洋樂以忘食鶴鳴九皋音亮帝側迺徵迺用將受
袞職昊天不弔賢人遘慝不遺一老屏此四國如
何穹蒼不照斯域惜哉朝廷喪茲舊德恨茲學士
將何法則

琴贊

他本皆無
張本有

惟彼雅器載璞靈山體其德真清和自然澡以春
雪澹若洞泉温乎其仁玉潤外鮮

樽銘十卷本無
他本皆有

酒以成禮弗愆以淫德將無醉過則荒沈盈而不
冲古人所箴尚鑿茲器懋勗厥心

盤銘他本皆無
張本有

華蓋就用以享嘉賓內納其實外若玄真

警枕銘十卷本無
他本皆有

應龍蟠蟄潛德保靈制器象物示有其形哲人降
鑒居安聞傾

衣箴

他本皆無
張本有

今人務在奢嚴志好美飾帛必薄細衣必輕煖或
一朝之晏再三易衣私居移坐不因故服

廣連珠

他本皆無
張本有

臣聞目瞶耳鳴近夫小戒也狐鳴犬嗥家人小妖
也猶忌慎動作封鎮書符以防其禍是故天地示
異災變橫起則人主恆恐懼而修政

道爲知者設馬爲御者良賢爲聖者用辨爲知者
通

祝社文

他本皆無
張本有

元正令午時惟嘉良乾坤交泰太族運陽乃祀社
靈以祈福祥

祖餞祝文

他本皆無
張本有

今歲淑月日吉時良爽應孔加君當遷行神龜吉
兆林氣煌煌著卦利貞天見三光鸞鳴雍雍四牡
彭彭君既升輿道路開張風伯雨師洒道中央陽
遂求福蚩尤辟兵倉龍夾轂白虎扶行朱雀道引
玄武作侶句陳居中厭伏四方往臨邦國長樂無
疆

楔文

他本皆無
張本有

洋洋暮春厥日除已尊卑煙鶩惟女與士自求百福在洛之涘

弔屈原文

他本皆無
張本有

鸛鳩軒翥鸞鳳挫翮啄碎琬琰寶其瓴甌皇車奔而失轄執轡忽而不顧卒壞覆而不振顧寰石其何補

九惟文

他本皆無
張本有

八惟困乏憂心殷殷天之生我星宿值貧六極之戾獨遭斯勤居處浮澗無以自存冬日栗栗上下同雲無衣無褐何以自溫六月徂暑炎赫來臻無

締無綌何以蔽身無食不飽永離歡欣

...

...

蔡中郎外集卷第一

...

...

...

...

...

...

蔡中郎外集卷第二

陳政要七事疏

十卷本無他本皆有
喬本劉本無疏字

臣伏讀聖旨雖周成遇風訊諸執事宣王遭旱密

勿祇畏無以或加臣聞天降災異緣象而至辟歷

數發

辟歷張本
作霹靂

殆刑誅繁多之所生也風者天之

號令所以教人也夫昭事上帝則自襄多福宗廟

致敬則鬼神以著國之大事實先祀典天子聖躬

所當恭事臣自在宰府及備朱衣迎氣五郊而車

駕稀出四時致敬屢委有司雖有解除猶為疏廢

故皇天不悅顯此諸異洪範傳曰政悖德隱厥風

發屋折木坤爲地道易稱安貞陰氣憤盛則當靜
反動法爲下叛夫權不在上則雹傷物政有苛暴
則虎狼食人貪利傷民則蝗蟲損稼去六月二十
八日太白與月相迫兵事惡之鮮卑犯塞所從來
遠今之出師未見其利上違天文下逆人事誠當
博覽衆議從其安者臣不勝憤懣謹條宜所施行
七事表左

一事明堂月令天子以四立及季夏之節迎五帝
于郊所以導致神氣祈福豐年清廟祭祀追往孝
敬養老辟靡示人禮化皆帝者之大業祖宗所祇

奉也而有司數以蕃國疏喪宮內產生及吏卒小
汚屢生忌故竊見南郊齋戒未嘗有廢至於宅祀
輒興異議豈南郊卑而宅祀尊哉孝元皇帝策書
曰禮之至敬莫重于祭所以竭心親奉以致肅祇
者也又元和故事復申先典前後制書推心懇惻
而近者以來更任太史忘禮敬之大任禁忌之書
拘信小故以虧大典禮妻妾產者齋則不入側室
之門無廢祭之文也所謂宮中有卒三月不祭者
謂士庶人數堵之室共處其中耳豈謂皇居之曠
臣妾之衆哉自今齋制宜如故典庶荅風霆災妖

之異

二事臣聞國之將興至言數聞內知己政外見民情是故先帝雖有聖明之資而猶廣求得失又因災異援引幽隱重賢良方正敦樸有道之選危言極諫不絕于朝陛下親政以來頻年災異而未聞特舉博選之旨誠當思省述修舊事使抱忠之臣展其狂直以解易傳政悖德隱之言奉以廷獻游三事夫求賢之道未必一塗或以德顯或以言揚頃者立朝之士曾不以忠信見賞恆被謗訕之誅遂使羣下結口莫圖正辭郎中張文前獨盡狂言

聖聽納受以責三司臣子曠然衆庶解悅臣愚以爲宜擢文右職以勸忠謇宣聲海內博開政路

四事夫司隸校尉諸州刺史所以督察姦枉分別白黑者也伏見幽州刺史楊熹益州刺史龐芝涼州刺史劉虔各有奉公疾姦之心熹等所糾其效尤多餘皆枉撓不能稱職或有抱罪襄瑕與下同疾綱網弛縱莫相舉察公府臺閣亦復默然五年制書議遣八使又令三公謠言奏事是時奉公者欣然得志邪枉者憂悸失色未詳斯議所因寢息昔劉向奏曰夫執狐疑之計者開羣枉之門養不

斷之慮者來讒邪之口今始聞善政旋復變易足
令海內測度朝政宜追定八使糾舉非法更選忠
清平章賞罰三公歲盡差其殿最使吏知奉公之
福營私之禍則衆災之原庶可塞矣

五事臣聞古者取士必使諸侯歲貢孝武之世郡
舉孝廉又有賢良文學之選于是名臣輩出文武
竝興漢之得人數路而已夫書畫辭賦才之小者
匡國理政未有其能陛下卽位之初先涉經術聽
政餘日觀省篇章聊以游意當代博奕非以爲教
化取士之本范書無而諸生競利作者鼎沸其高

者頗引經訓風喻之言下則連偶俗語有類俳優
或竊成文虛冒名氏臣每受詔於盛化門差次錄
第其未及者亦復隨輩皆見拜擢既加之恩難復
收改但守奉祿于義已弘不可復使理人及仕州
郡昔孝宣會諸儒于石渠章帝集學士于白虎通
經釋義其事優大文武之道所宜從之若乃小能
小善雖有可觀孔子以爲致遠則泥君子固當志

其大者

固范書
作故

六事墨綬長吏職典理人皆當以惠利爲績日月
爲勞褒責之科所宜分明而今在任無復能省及

其還者多召拜議郎郎中若器用優美不宜處之
冗敝如有釁故自當極其刑誅豈有伏罪懼考反
求遷轉更相倣效臧否無章先帝舊典未嘗有此
可皆斷絕以覈真僞

七事伏見前一切以宣陵孝子爲太子舍人臣聞
孝文皇帝制喪服三十六日雖繼體之君父子至
親公卿列臣受恩之重皆屈情從制不敢踰越今
虛僞小人本非骨肉旣無幸私之恩又無祿仕之
實惻隱思慕情何緣生而羣聚山陵假名稱孝行
不掩心掩范書義無所依至有姦軌之人通容其

中桓思皇后祖載之時東郡有盜人妻者亡在孝
中本縣追捕乃伏其辜虛偽雜穢難以勝言又前
至得拜後輩被遺或經年陵次以暫歸見漏或以
人自代亦蒙寵榮爭訟怨恨洶洶道路洶洶范書
作凶凶
太子官屬宜搜選令德豈有但取丘墓凶醜之人
其爲不祥莫與大焉宜遣歸田里以明詐僞

曆數議

他本無張本劉本
作元不引司馬志律曆文

熹平四年五官郎中馮光沛相上計掾陳晁言
曆元不正故妖民叛寇益州盜賊相續爲曆用
甲寅爲元而用庚申圖緯無以庚爲元者近秦

所用代周之元太史治曆郎中郭香劉固意造
妄說乞與本庚申元經緯有明受虛欺重誅乙
卯詔書下三府與儒林明道者詳議務得道真
以羣臣會司徒府議議郎蔡邕議以為此司馬志律

曆文張本雙行刻列題左節去議郎蔡邕議以為七字而刪撥志文未太尉耽等以邕議劾光

晃不敬正鬼薪法詔勿治罪二十字綴于會司徒府議句下非是

曆數精微去聖久遠得失更迭術術無常是以承
秦曆用顓頊元用乙卯百有二歲孝武皇帝始改
正朔曆用太初元用丁丑行之百八十九歲孝章
皇帝改從四分元用庚申今光晃各以庚申為非

甲寅爲是案曆法黃帝顓頊夏殷周魯凡六家各
自有元光晁所據則殷曆元也他元雖不明于圖
讖各家術皆當有效于其當時黃帝始用太初丁
丑之元有六家紛錯爭訟是非太史令張壽王挾
甲寅元以非漢曆雜候清臺課在下第卒以疏闊
連見劾奏太初效驗無所漏失是則雖非圖讖之
元而有效于前者也及用四分以來考之行度密
于太初是又新元效于今者也延光元年中謁者
亶誦亦非四分庚申上言當用命曆序甲寅元公
卿百寮參議正處竟不施行且三光之行遲速進

退不必若一術家以算追而求之取合于當時而已故有古今之術今之不能上通于古亦猶古術之不能下通于今也元命苞乾鑿度皆以爲開闢至獲麟二百七十六萬歲及命曆序積獲麟至漢起庚子蔀之二十三歲竟己酉戊子及丁卯蔀六十九歲合爲二百七十五歲漢元年歲在乙未上至獲麟則歲在庚申推此以上上極開闢則不在庚申讖雖無文其數見存而光晁以爲開闢至獲麟二百七十五萬九千八百八十六歲獲麟至漢百六十二歲轉差少一百一十四歲云當滿足則

上違乾鑿度元命苞中使獲麟不得在哀公十四
年下不及命曆序獲麟漢相去四部年數與奏記
譜註不相應當今曆正月癸亥朔光晃以爲乙丑
朔乙丑之與癸亥無題勒款識可與衆共別者須
以弦望晦朔光魄虧滿可得而見者考其符驗而
光晃曆以考靈曜二十八宿度數及冬至日所在
與今史官甘石舊文錯異不可考校以今渾天圖
儀檢天文亦不合於考靈曜光晃誠能自依其術
更造望儀以追天度遠有驗于圖書近有效于三
光可以易奪甘后窮服諸術者實宜用之難問光

晁但言圖讖所言不服元和二年二月甲寅制書
曰朕聞古先聖王先天而天不違後天而奉天時
史官用太初鄧平術冬至之日日在斗二十二度
而曆以爲牽牛中星先立春一日則四分數之立
春也而以折獄斷大刑于氣已迄用望平和蓋亦
遠矣今改行四分以遵于堯以順孔聖奉天之文
是始用四分曆庚申元之詔也深引河洛圖讖以
爲符驗非史官私意獨所興構而光晁以爲固意
造妄說違反經文謬之甚者昔堯命羲和曆象日
月星辰舜叶時月正日湯武革命治曆明時可謂

正矣且猶遇水遭旱戒以蠻夷猾夏寇賊姦宄而
光晃以爲陰陽不和姦臣盜賊皆元之咎誠非其
理元和二年乃用庚申至今九十二歲而光晃言
秦所用代周之元不知從秦來漢三易元不常庚
申光晃區區信用所學亦妄虛無造欺語之愆至
于改朔易元往者壽王之術已課不效亶誦之議
不用元和詔書文備義著非羣臣議者所能變易
志注臣昭曰不有君子其能國乎觀夫蔡邕之議
可以言天機矣賢明在朝弘益遠哉公卿結正足
懲淺妄之徒詔書勿
洽亦深盍各之致

正交論

近十卷本無他本皆有案此論體甚
歐輯不載十卷本故差勝也

聞之前訓曰君子以朋友講習而正人無有淫朋
是以古之交者其義敦以正其誓信以固逮夫周
德既衰頌聲既寢伐木有鳥鳴之刺谷風有棄予
之怨自此以降彌以陵遲陵各本作
凌非是或闕其始終
或彊其比周是以搢紳患其然而論者諄諄如也
疾淺薄而褻攜貳者有之惡朋黨而絕交游者有
之其論交也曰富貴則人爭趨之貧賤則人爭去
之是以君子慎人所以交己審己所以交人富貴
則無羣集之客貧賤則無棄舊之賓矣原其所以
來則知其所以去見其所以始則觀其所以終彼

貞士者貧賤不待夫富貴富貴不驕乎貧賤故可
貴也蓋朋友之道有義則合無義則離善則久要
不忘平生之言惡則忠告善誨之否則止無自辱
焉故君子不爲可棄之行不患人之遺己也信有
可歸之德不病人之遠己也不幸或然則躬自厚
而薄責于人怨其遠矣求諸己而不求諸人咎其
稀矣夫遠怨稀咎之機咸在乎躬莫之致也子夏
之門人問交于子張而二子各有聞乎夫子然則
以交誨也商也寬故告之以拒人師也褊故訓之
以容衆各從其行而矯之至于仲尼之正教則汎

愛衆而親仁故非善不喜非仁不親交游以方會
友以文可無貶也穀梁赤曰心志既通名譽不聞
友之罪也今將患其流而塞其源病其末而刈其
本無乃未若擇其正而黜其邪與與其彼農皆黍
而獨稷焉夫黍亦神農之嘉穀與稷並爲粢盛也
使交可廢則黍其愆矣括二論而言之則刺薄者
博而洽斷交者貞而孤孤有羔羊之節與其不獲
已而矯時也走將從夫孤焉

銘論

他本皆無
張本有

春秋之論銘也曰天子令德諸侯言時計功大夫

稱伐昔肅慎納貢銘之楛矢所謂天子令德者也

若黃帝有巾几之法孔甲有盤盂之誠殷湯有甘

誓之勒案夏書書序云甘誓啓冕鼎有不顯之銘

武王踐阼咨于太師作席几楹杖之銘十有八章

周廟金人緘口以慎緘張本作非是亦所以勸導人主

勛于令德者也呂尚作周太師封于齊其功銘于

昆吾之冶獲寶鼎于美陽仲山甫有補袞闕誠百

辟之功周禮司勳凡有大功者銘之太常所謂諸

侯言時計功者也有宋大夫正考父三命滋益恭

而莫侮衛孔悝之祖莊叔隨難漢陽左右獻公衛

國賴之皆銘乎鼎晉魏顥獲杜回于輔氏銘功于景鐘所謂大夫稱伐者也鐘鼎禮樂之器昭德紀功以示子孫物不朽者莫不朽于金石故也近世以來咸銘之于碑

徙朔方報楊復書他本皆無張本有

昔此徙者故城門校尉梁伯喜南郡太守馬季長或至三歲近者歲餘多得旋返自甘罪戾不敢慕此

徙朔方報羊月書他本皆無張本有

幸得無恙遂至徙所自城以西惟青紫鹽也

辭郡辟讓申屠蟠書他本無張本有劉本列補遺題作讓辟申屠蟠

張本注蟠家貧傭為漆工邕深重蟠及被州辟乃辭讓之

申屠蟠稟氣玄妙劉本無氣性敏心通喪親盡禮

幾于毀滅至行美誼人所鮮能安貧樂潛味道守

真不為燥溼輕重不為窮達易節張本無不為窮達易節句從劉

增本方之于邕以齒則長以德則賢

與袁公書他本皆無張本有

朝夕游談從學宴飲酌麥醴燔乾魚欣欣焉樂在

其中矣

與人書他本皆無張本有

家祖居常言客有三當死夜半蠶時至入室家也
今者一行而犯其兩

與人書 他本皆無
張本有

邕薄祜早喪二親年踰三十鬢髮二色叔父親之
猶若幼童陸則對坐食則比豆

女訓 他本皆無
劉本補遺

心猶首面也是以甚致飾焉面一日不修則塵垢
穢之心一朝不思善則邪惡入之咸知飾其面不
修其心惑矣夫面之不飾愚者謂之醜心之不修
賢者謂之惡愚者謂之醜猶可賢者謂之惡將何

容焉故覽照拭面則思其心之潔也傅脂則思其
心之和也加粉則思其心之鮮也澤髮則思其心
之潤也用櫛則思其心之理也立髻則思其心之
正也攝鬢則思其心之整也

蔡中郎外集卷第二

...

與人書

...

...

...

...

...

...

...

蔡中郎外集卷第三

漢津賦

十卷本無
他本皆有

夫何大川之浩浩兮洪流淼以玄清配名位乎天
漢披厚土而載形登源自乎蟠冢引漾澧而東征
納陽谷之所吐兮兼漢沔之殊名總畎澮之羣液
兮演西土之陰精遇萬山以左迴兮旋襄陽而南
滎切大別之東山兮與江湘乎通靈嘉清源之體
勢兮澹澶浚以安流鱗甲育其萬類兮蛟龍集以
嬉遊明珠胎于靈蚌兮夜光潛乎玄洲雜神寶其
充盈兮豈魚龜之足收于是遊目騁觀南援三州

北集京都上控隴坻下接江湖導財運貨懋遷有
無既乃風颯蕭瑟勃焉並與陽侯沛以奔驚洪濤
涌而沸騰願乘流以上下窮滄浪乎三澨覲朝宗
之形兆瞰洞庭之交會

今賦十卷本無協和婚賦他本皆有

惟情性之至好歡莫偉乎夫婦受精靈之造化固
神明之所使事深微以玄妙實人倫之肇始考邃
初之原本覽陰陽之綱紀乾坤和其剛柔良兌感
其晦腓葛覃恐其失時標梅求其庶士唯休和之
盛代男女得乎年齒婚媾協而莫違播欣欣之繁

祉良辰既至婚禮已舉二族崇飾威儀有序嘉賓
僚黨祁祁雲聚車服照路驂駢如舉既臻門屏結
軌下車阿傅御堅雁行蹉跎麗女盛飾曄如春華

檢逸賦

他本皆無
張本有

夫何姝妖之媛女顏煒燁而含榮普天壤其無儷
曠千載而特生余心悅于淑麗愛獨結而未并情
罔寫而無主意徙倚而左傾晝騁情以舒愛夜託
夢以交靈

協初賦

他本皆無
張本
有疑有闕文

其在近也若神龍采鱗翼將舉其既遠也若披雲

緣漢見織女立若碧山亭亭豎動若翡翠奮其羽
衆色燎照眎之無主面若明月輝似朝日色若蓮
葩肌如凝蜜

青衣賦

他本皆無
張本有

金生砂礫珠出蚌泥歎茲窈窕產于卑微盼倩淑

麗皓齒蛾眉

皓本作皓
所無當是皓字書

玄髮光潤領如螭

螭縱橫接髮葉如低葵脩長冉冉碩人其頤綺袖
丹裳躡蹈絲扉盤跚蹀坐起低昂和暢善笑動
揚朱脣都冶斌媚卓躒多姿精慧小心趨事如飛
中饋裁割莫能雙追關雎之潔不蹈邪非察其所

履世之鮮希宜作夫人爲衆女師伊何爾命在此
賤微代無樊姬楚莊晉妃感昔鄭季平陽是私故
因錫國歷爾邦畿雖得嫵婉舒寫情懷寒雪繽紛
充庭盈階兼裳累鎮展轉倒頽暎昕將曙雞鳴相
催飭駕趣嚴將舍爾乖矇冒矇冒思不可排停停
溝側噉噉青衣我思遠逝爾思來追明月昭昭當
我戶扉條風狎躡吹予牀帷河上消搖徙倚庭階
南瞻井柳仰察斗機非彼牛女隔于河維思爾念
爾怒焉且饑

警師賦

他本皆無張本
有疑有關文

夫何矇昧之瞽兮心窮忽以鬱伊目冥冥而無睹
兮嗟求煩以愁悲撫長笛以攄憤兮氣轟鏗而橫
飛

又

他本皆無張本有疑與
前合為一首且有闕文

何此聲之悲痛愴然淚以隱惻類離鷓之孤鳴起
嫠婦之哀泣詠新詩之悲歌舒滯積而宣鬱

筆賦

十卷本無
他本皆有

惟其翰之所生于季冬之狡兔性精亟以慄悍體
端迅以騁步削文竹以為管加漆絲之纏束形調
博以直端染玄墨以定色畫乾坤之陰陽讚處皇

之洪勳叙五帝之休德揚蕩蕩之明文紀三王之
功伐兮表八百之肆覲博六經而綴百氏兮建皇
極而序彝倫綜人事于晻昧兮贊幽冥于明神象
類多喻靡施不協上剛下柔乾坤位也新故代謝
四時次也圓和正直規矩極也玄首黃管天地色
也

案藝文類聚
此篇傅毅作

琴賦

十卷本及張本
無喬本汪本有

歷松岑而將降睹鴻梧于幽阻高百仞而不枉對
修條而特處蹈通崖而往遊圖茲梧之所宜信雅
琴之麗樸乃弁伐其孫枝命離婁使布繩施公輸

之剖劂遂雕琢而成器揆神農之初制盡聲變之

奧妙抒心志之鬱滯

案藝文類聚此篇傳毅作

又

他本皆無張本有

閒關九絃出入律呂屈伸低昂十指如雨

又

他本皆無張本有案此及前首似皆是斷句張本亦未注明采自何籍今且過而存

之

于是歌人恍惚以失曲舞者亂節而忘形哀人塞

耳以惆悵轅馬蹠足以哀鳴

彈琴賦

十卷本無喬本原注一本作頌汪本劉本同張本無彈字賦文多前一段

爾乃言求茂木周流四垂觀彼椅桐層山之陂丹

華煒煒綠葉參差甘露潤其末涼風扇其枝鸞鳳
翔其顛玄鶴巢其岐考之詩人琴瑟是宜爰制雅
器協之鍾律通理治性恬淡清溢以上從張本
他本皆無爾
乃清聲發兮五音舉韻宮商兮動徵羽曲引興兮
繁絲撫然後哀聲既發祕弄乃開左手抑揚右手
徘徊抵掌反覆抑按藏摧于是繁絃既抑雅韻乃
揚仲尼思歸鹿鳴三章梁甫悲吟周公越裳青雀
西飛別鶴東翔飲馬長城楚曲明光走獸率舞飛
鳥下翔感激絃歌一低一昂

彈碁賦

十卷本無
他本皆有

榮華灼爍萼不韡韡于是列象雕華逞麗豐腹斂
邊中隱四企輕利調博易使馳騁然後我製兵綦
夸驚或風飄波動若飛若浮不遲不疾如行如留
放一敝六功無與儔

又他本皆無張本有案文意似與前首合為
一而尚有闕文無本可據姑從張本分別

夫張局陳碁取法武備因嬉戲以肄業託歡娛以
講事設茲矢石其夷如破采若錦績平若停水肌
理光澤滑不可屢乘色行巧據險用智

團扇賦他本皆無
張本有

裁帛製扇陳象應矩輕徹妙好其輶如羽動角揚

徵清風逐暑春夏用事秋冬潛處

胡栗賦

十卷本無他本皆有張本另行敘
人有折蔡氏祠前栗者故作斯賦

樹遐方之嘉木兮于靈宇之前庭通二門以征行
兮夾階除而列生彌霜雪而不彫兮當春夏而滋
榮因本心以誕節兮凝育斲之綠英形猗猗以豔
茂兮似翠玉之清明何根莖之豐美兮將蕃熾以
悠長適禍賊之災人兮嗟夭折以摧傷

蟬賦

他本皆無
張本有

白露淒其夜降秋風肅以晨興聲嘶隘以沮敗體
枯燥以冰凝雖期運之固然獨潛類乎大陰要明

年之中夏復長鳴而揚音

荅元式詩

十卷本無他本皆有張本荅字下有對字非是

伊余有行爰戾茲邦先進博學同類率從濟濟羣
彥如雲如龍君子博文貽我德音辭之輯矣穆如
清風

翠鳥詩

十卷本無他本皆有

庭陬有若榴綠葉含丹榮翠鳥時來集振翼修形
容迴顧生碧色動搖揚縹青幸脫虞人機得親君
子庭馴心托君素雌雄保百齡

荅卜元嗣詩

他本皆有張本無

斌斌碩人貽我以文辱此休辭非余所希敢不酬
荅賦誦以歸

蔡中郎外集卷第三